



23. januar 2011

UPA 2011/42

Inatsisartut Suleriaasianni § 36 naapertorlugu apeqquteqaat aallaavigalugu oqallissiaq imattoq matumuuna saqqummiuppara:

**Kalaallit Nunaanni eqqartuussisoqarnermik nutarterineq qanorlu pisunik malit-tarinneq pillugit apeqquteqaat aallaavigalugu oqallinnissamik siunnersuut.**  
(Inatsisartuni ilaasortaq Juliane Henningsen, Inuit Ataqatigiit)

Eqqartuussisoqarnerup nutarterneqarnissa nunatsinni sivisuumik utaqqineqarsimavoq, pinerluttuliornerlu pillugu inatsit, eqqartuussisarnermik inatsit kiisalu eqqartuussisoqarneq tamakkiisumik isigalugit nutarterneqarnissaat pisariaqavissimavoq. Taamaattorli imaanngilaq suli pitsangorsaaqqittoqarsinnaannngitsoq.

Uagut nunatsinni qinikkatut nuanaarutigisassarput immikkullu isiginagiassat pingaarute-qartut ilagaat maannakkut kiisami nunatsinni parnaarussivimmik nutaamik sanaartor-toqarnissa aalajangiivigineqarmat, tamannalu danskit aningaasanut inatsisaanni immikkut inissinneqarluni. Taamaalillatalu kalaaleqativut pillaatigineqartup atuutinnejqarnissa siunertaralugu paarnaarussajartillugit Danmark-imut aallartitarunnaartussa-vagut. Ilaquttatik, ikinngutitik nunartillu qimallugit ungassisumut pisinneqartarput. Tamanna nutaaliorneq ukiorpassuarni kissaatigisimavarput, ilaatigullu tamannarpiaq kattuf-finnit assigiinngitsunit inuit pisinnaatitaaffiinik illersuinermik ingerlassaqartunit ukiorpas-suannngortuni uparuartorneqartarsimavoq.

Uanga isumaga naapertorlugu nutaamik paarnaarussiveqalerneremi immikkut eqqumaf-figineqartussat ilagaat inuit parnaarussaanerminni atugarisassaat. Assersuutigalugu atornerluisut katsorsarnissaannut suut neqeroorutigineqassappat? Paarnaarussat sulia-qartinnejqarnissaannut ilinniagaqartitaanissaannullu suut periarfissaassappat? Assersuu-tigalugu kamaqarnerup iliuuseqarfingineqarnissaanut pisariaqavissumik ikiorserneqarsin-naanissaat eqqarsaatigalugu tarnip pissusiinik ilisimasalinnit ikorsiinissamut suut periarfissaassappat? Parnaarussat iperagaanerminni inuiaqatigiinni inooqataalluarsinna-nissaminnut periarfissaqassappata tamakku iliuusissat pisariaqarluinnartut naammasse-reertariaqarput.

Taamatuttaaq inunnik Herstedvester-imi paarnaarussaasunik nunatsinnut nuussinissat pillugit sukumiisumik piareersaanissamut danskit tungaannit ilisimanninnissaq pingaar-teqarluinnarpoq. Paarnaarussivimmi nutaami naammattunik ilinniarluarsimasunillu suliso-qarnissa - eqqarsaatigalugit parnaarussivimmi sulisut, taamatullu tarnip pissusaanik ili-simasallit isumaginninnermilu siunnersortit pinngitsoorani qulakkeertariaqarpoq.

Herstedvester-imi parnaarussanik nunatsinnukartitsinermut atatillugu immikkut pingaar-titassaq uagut nunatsinni qinikkatut nammineerluta akisussaaffissatut tigusariaqarparput. Tassaavorlu inuiaqatigiit kalaallit akunnitsinni oqallinnissaq pisariaqartoq aallart-isassallugu. Kalaallit ukiorpassuarni avammut aallarussaasimasutut inuusimasut ute-nerat qanoq isumaqarfigaarput. Inuit tamarmik naleqartuummata aamma inuit uani pineqartut nunatsinni inuiaqatigiinnut akuleqqittussaammata uagut nunatsinni inuia-qatigiit eqqarsaatersuuteqarnissarput pisariaqarpoq.

Eqqartuussisoqarnerup nutarterneranut atatillugu nunatsinni inuiaqatigiinnut, taamatullu inoqatitsinnut arlaanik patsiseqartumik eqqartuussisoqarnermik aqquaagaqarsimasunut

eqqartuussiviit pitsaasumik ingerlanissaat pingaaruteqartunut ilaavoq. Nunap immikkoortuini eqqartuussivinni suliassarititap piaarnerpaamik suliarineqarnissaa pingaaruteqarpoq, taamatullu eqqartuunneqaraanni pillaatip piaarnerpaamik atortuutinnejarnissaa pingaaruteqarluni. Taamaakkaluartoq pineqartuni taakkunani marlunni suli ajornartorsiuteqarpoq unamminartoqarlunilu. Nunap immikkoortuini eqqartuussivinnut isertitsivinnullu utaqqisopassuaqarnera akuerineqarsinnaanngittuarpoq, ajornartorsiutinillu nassataqartuarluni.

Politiini eqqartussivinnilu suliassangortitat pilertornerusumik suliarneqarsinnaanngogqulugit qanoq iliuuseqartoqarsinnaava? Ajornartorsiut politiinik amerlanernik atorfinititsinkut imaluunniit eqqartuussiviit amerlanerusunik nutserisussanik pilersorneqarnerisigut qaangilertorneqarsinnaava, imaluunniit politiini eqqartuussivinnilu suliassarpasautt apparsariarumallugit eqqartuussinermut taartaasinnaasutut saammaateqatigiinnissamut perarfissap annertunerusumik atorneqalerteratigut tamanna aamma qaangilertorneqarsinnaava?

Kalaallit Nunaanni eqqartuussiveqarneq pillugu isumaliutissiissut Inatsisartut 2006-imi upernaakkut akuersissutigimmassuk, ilaatigut inassutigivaat aaqqiagiinngissut pillugu isumaqatigiinniarsinnaaneq misilgutitut periarfissiissutaasariaqartoq. Periarfissaq inuu-suttuaqqanut inatsisnik unioqqutitsimasunut, angerlarsimaffimmi perulluliortunut aammalu politiit maleruaqquaannik unioqqutitsisunut killilerneqarsinnaasorineqarluni inassutigineqarpoq. Periarfissaq tamanna eqqartuussivinnut isertitsivinnullu utaqqisopassuaqarneranut apparsaaqataasinjaava?

Kangerlussuarmi utaqqiisaasumik isertitsivimmik pilersitsinerup malitsigisaanik utaqqisitat ikilinerat nuanaajallannarpoq tupallaannaranili. Nuanninngitsortiali unaavoq Kangerlussuarmi isertitsiviup matuneratigut utaqqisut amerleqqinnissaat eqqarsaatigineqarsimannngimmat. Kingumut nunatsinni eqqartuunneqarsimasut qaammaterpassuarni ilaatigullu ukiuni arlaqartuni pillaatimit atortuutinnejarnissaa utaqqisariaqaleqqissavaat. Innuttaasut eqqortumik iliornissamik misigissusaannut akornusersuisuovoq, utaqqisullu amerleqqinnginnissaat anguniarlugu arlaatigut iliuuseqartariaqarpugut.

Tamakku oqaatigereerlugit aamma pingaaruteqarpoq oqassalluni eqqartuussive-qarnerup tungaatigut nutarterinerit pisariaqartut aallartisarneqalereermata. Nunap immikkoortuini eqqartuussisut angusiffiusumik inaarutaasumillu ilinniaqalersinnaanerat nuannaarutisaavoq, taamatullu eqqartuussisut sulinermanni atugaasa pitsangorsaavagineqarneri nuannaarutissaalluni. Kiisalu teknologi atorlugu sapinngisamik oqilsaaneq nuannaarutisaavoq. Tassunga atatillugu video aqqutiluttoq atorlugu eqqartuussinerit ingerlanneqarniaraangata qaqtigunngitsumik teknikkut ajornartorsiuteqartartoq, aammalu nunatsinni sassartinneqarluni illersuisoq Danmark-imiittooq peqatigalugu kisimiilluni oqaloqati-giissinnaasарneq killeqartoq paasivara. Tamatumani aamma aaqqitassaqarpoq. Pisinaatitaaffinnut toqqammaviusut tamanut atuuttut naammaginartumik malinneqassap-pata nunatsinni aamma eqqartuussisoqarnermi naapertuilluartumik eqqartuussinerit ingerlanneqartariaqarput.

Inatsisinkat atortitsineq ataatsimut isigalugu suli naalagaaffimmit oqartus-saaffigineqarpoq taamaattumillu eqqartuussisoqarnermik nutarteriniarneq suli aamma naalagaaffimmit aningaasalersorneqartussaavoq. Tamannali oqaatigereerlugu ilanngullugu nassuerutigisinnaasariaqarparput inuiaqatigiittut aamma uagut eqqartuussiveqarnikkut iluarsartuussinerup iluatsilluarnissaanut sunniuteqaaqataasinjaagatta. Inuiaqatigiinni pinerliiniartaneq annikillisarumallugu qanoq nammineq iliuuseqarsinnaavugut? Ilisimavarpummi persuttaasarneq aammalu toqutsisarneq naalagaaffeqatigisatsinnut allanut sanilliullugit maani nunatsinni akulikinnerujussuummata. Alla kisitsit eqqarsariarnartoq tassaavoq 2009-imi angerlarsimaffinni perulluliornenit 3.685-it Kalaallit Nunaanni politiinik suliarineqarsimammata - tassalu ullormut perulluliornenit qulit sinnerlugit! Angerlarsimaffinni perulluliornenit taakkunanna suliani 551-ini meeqqat akulerusimatinnejarnissappat. Suliat tamakku qaavisigut aalakorlutik pinerliiniarsimasut 1.423-it suliarineqarsimappat.

Apeqquuteqaat aallaavigalugu oqallinnerput manna iluatsillugu taamaammat partiinit tusarusunnarpoq kisitsisit tamakku nikallunganartut qanoq iliuuseqarnikkut annikilleriar-tinnejarsinnaanersut, eqqartuussiveqarnikkut iluarsartuussinerup iluatsilluarnissaa aamma angulertorsinnaajumallugu?

Eqqartuussisoqarnerup nutarterneqarneranut maannakkut ingerlanneqartumut atatillugu oqaaserpassuit aninneqarsinnaagaluarput, taamaattorli eqqarsaatigisassaq kingulleq imannaangitsorlu tikkuartariaqartoq tassaavoq nunaqarfinni avinngarusimasunilu inatsisinik maleruaasitsiniarneq, imaluunniit tamassuma amigaataanera. Tassani eqqarsaatigaara kommuneffoged-inik amigaateqarnerujussuaq, taamatullu ajornartorsiutaanera naalagaafiup pimoorullugu iliuuseqarfisariaqarpaa. Taamatuttaaq eqqaasariaqarpoq Kangaatsiap eqqaanilu nunaqarfiiit politeeqartinneqarnerat. Tamaani innuttaasut 1.400 missaaniipput, taakkulu naam-mattumik politeeqartinneqanngillat. Tamanna aaqqiivigineqartariaqarpoq.

Uanga isiginnittasera naapertorlugu nuannaarutigineqarsinnaasut arlaqarput, taamaattorli aamma unamminartorpassuit pisortanit akisussaaffimmik tigumminnitunit nangittumik annertunerusumillu alaatsinaaffigineqartariaqartoqarpoq. Taamaammat taamatut apeqquuteqaat aallaavigalugu oqallinnisatsinni neriuutigaara Naalakkersuisut – kiisalu minnerunngitsumik danskit Naalakkersuisui – apeqquutinut pingaaruteqartunut matumani ilaatigut saqqummiunneqartunut inerniliinissat siunertaralugit eqqarsaatersuuteqarumaartut. Tamanna parnaarussanut, eqqartuussaasunut, pinerluuteqarnerni eqqugaasunut, minnerunngitsumillu inuiaqatigiinnut tamatsinnut soorunami pingaaruteqarpoq.

Pikkunartumik pissarsiviulluartumillu oqallittoqarnissaa pissangallunga naalaarumaarpa-ra. Qujanaq.